

Месяца августа в Неделю перед 18-м днем
Собор Кемеровских святых

На велицей вечерни

На Господи, воззвах: стихиры на 10: воскресны 4, и святых 6, глас 1:

Приидите, вернии, и видите дела Божия,/ яже сотвори Господь:/ земнороднии, житейское попечение отложше,/ составим лик празднующих,/ днесь бо нам небесное радование,/ прославим святых, в земли Кемеровской просиявших/ и к ним возопиим:/ молитесь, святии, о сродницех ваших,/ любовью память вашу прославляющих.

Веселися, земле Сибирская,/ и похвали Господа Бога,/ яко Той благослови святых Своя в тебе,/ иже ныне предстоят Престолу Его,/ и, яко светила незаходимая,/ землю Кемеровскую озаряют/ и молятся непрестанно о всех нас,/ память их любовью совершающих.

Егда умножишася шатания суемудрых/ и распрострошася беззакония заблуждших,/ тогда, верою укрепляемии,/ не убоястесь убивающих тело/ души убить не могущих,/ но паче изостристе веры и любве мечи духовныя, обоюду острия,/ и сими победили всю силу вражью./ Все святии земли Кемеровския,/ молитесь о душах наших.

Священномучениче Павлине,/ сердце милующее ко всякой твари имея,/ мужество твердое явил еси/ и, о избрании Предстоятеля Церкви Русския ревнуя,/ многи скорби от безбожных власти претерпел еси,/ убиен же быв с братиею от беззаконник,/ венец нетленный от Судии Праведнаго приял еси./ Егоже моли помилватися душам нашим.

Досточудне священномучениче Амфилохие,/ столп непоколебимый Церкви Русския явился еси,/ и за кресты, на дщицах изображенныя,/ неправдене осужден был еси,/ крест же мученический со смирением взял,/ того безропотне понесл еси/ и, даже до смерти пострадав,/ кровь твою за Христа пролиал еси./ Егоже моли спастися душам нашим.

Глас 4:

Приидите, вернии людие,/ прославим старцы Божия:/ Василиска Сибирскаго, Зосиму Верховскаго и Петра Томскаго,/ и сице им возопиим:/ радуйтеся, страны Сибирския велие украшение/ и земли пустынный благовонное процветение,/ радуйтеся, деяний молитвенных сокровище пребогатое/ и благодати Божественныя источники/ всем, любовью вас почитающим.

Слава, глас 6:

Церкве Русския славо/ и земли Сибирския украшение,/ святии сродницы наши:/ вы, изгнание и лютая страдания мужественне претерпевше,/ от тьмы века сего к незаходимому Свету прешли есте./ Ныне же, во славе Небесней пребывающе,/ молитесь о еже сохранитися нам в Православии/ и спастися душам нашим.

И ныне, Богородичен воскресен.

Вход. Прокимен дне. И чтения три.

1. Деяний святых апостол чтение (глава 4,1-12). Во дни оны, глаголющим апостолом к людям:

2. Деяний святых апостол чтение (глава 4, 13-22). Во дни оны, видяще Петрово дерзновение:

3. Деяний святых апостол чтение (глава 4, 23-35). Во дни тыя, отпущена бывша апостола:

На литии стихиры, глас 2:

Радуйся, священномучениче Анатолие,/ пастырю ревностный Церкве Божия,/ сродниче наш, пострадавый в новомученицех,/ радуйся и ты, достохвальне Мироне,/ Богу усердно моливыйся/ и угрозы безбожных нивчтоже вменивый./ О, иереи победоноснии,/ молитесь милостиваго Бога/ спастися душам нашим.

Радуйся, Серафиме, верный свидетелю веры Христовы,/ радуйся, Павлине, твердый ревнителю избрания предстоятеля Церкве Русския,/ радуйся, Аркадие, союзниче и сомолитвенниче их предоброй./ О, святителие достославнии и священномученицы добробеднии,/ Божества Триипостаснаго вернии служителие,/ молитесь о спасении душ наших.

Слава, глас тойже:

Приидите, ублажим новомученики и исповедники,/ иже страдания многообразная претерпевше/ и живот свой в дар Христу Богу принесше,/ Царствия Небеснаго жители явишася./ Темже к ним с любовью возопиим:/ яко велие имуще дерзновение ко Господу,/ молитесь спастися душам нашим.

И ныне, Богородичен, глас тойже:

Тя, Всепетую Владычицу,/ яко Всецарицу, Христу Царю предстоящую,/ вкупе со всеми святыми земли Кемеровския/ достойно величаем.

На стиховне стихиры воскресны.

Слава, глас 6:

Теплии наши заступницы,/ святии земли Кемеровския,/ Православныя веры поборницы/ и любви Божия вернии свидетелие,/ молитесь, о еже спастися нам.

**И ныне, Богородичен.
Тропарь святых, глас 4:**

Днесь радостно ликует земля Кемеровская,/ прославляющи новомученики, исповедники, преподобныя и праведныя своя,/ добродетельми Богу послужившия/ и во дни гонения безбожнаго жизнь свою за Христа положившия./ Темже к ним усердно воззовем:/ молити Милостиваго Бога/ спастися душам нашим.

На утрени

На Бог Господь: тропарь воскресен, дважды. Слава, собору святых. И ныне, Богородичен.

По 1-м и 2-м стихословии седальны воскресны.

Величание:

Величаем вас,/ вси святии, в земли Кемеровской просиявшии,/ и чтим святую память вашу,/ вы бо молити за нас/ Христа Бога нашего.

Псалом избранный: Бог нам Прибежище и Сила:

Господи, воздвигни силу Твою и прииди, во еже спасти ны.

Глаголах о свидениях Твоих пред цари и не стыдяхся.

Вси языцы обыдоша мя и именем Господним противляхся им.

Дивен Бог во святых Своих, Бог Израилев.

Ипакои, таже седален святых, глас 3:

Страдании новомучеников и исповедников земли Кемеровския, иже по Тебе пострадаша, умолен буди Господи, и вся наша болезни и страсти исцели, Человеколюбче, молимся.

Слава, глас тойже:

Страстотерпцы Господни, блаженна земля напитавшаяся кровьюми вашими: на судищи бо врага обличисте и Христа со дерзновением проповедасте. Того, яко Блага, молити спасти души наша.

И ныне, Богородичен:

Богородице Дево Марие, рождшая Христа Избавителя и Спаса, молися Ему со святыми земли нашея, очищение грехов даровати нам и велию милость.

Степенна гласа. Прокимен и евангелие воскресны.

Канон воскресный со ирмосом на 4, Богородицы на 2 и святых, на 8.

Канон святых, глас 8.

Песнь 1

Ирмос: Воду прошед, яко сушу,/ и египетскаго зла избежав,/ израильтянин вопияше:/ Избавителю и Богу нашему поим.

Припев: Все святые земли Кемеровския, молитесь Бога о нас.

Озари Господи сердце мое светом благодати Духа Твоего Святаго, да воспую святых земли Кемеровския и прославлю Твое Божество.

Приидите, празднующие, восхвалим Господа, дивнаго во святых Своих древних и новых, волею и неволею преселившихся в землю нашу и светом любви Христовыя ю озаривших.

Слава: Троице Святая, Единице Нераздельная, Триипостасная Сило и Славо, освятившая землю нашу подвигом и кровью святых Твоих, непрестанно Тя славословящих, сподоби и нас Твоего Божественнаго сияния.

Богородичен: Богородице Пречистая, Мати рода христианскаго, осени нас покровом Твоим, молитв ради святых земли нашея, да избавимся от бед и скорбей.

Песнь 3

Ирмос: Небеснаго круга Верхотворче, Господи,/ и Церкви Зиждителю,/ Ты мене утверди в любви Твоей,/ желаний краю, верных утверждение,/ Едине Человеколюбче.

О, предивный Василисче, смирение Христово стяжавый и Горняго мира звание улучивый! Ты, красная мира сего презрев, в земли пустынной Бога обрел еси и многих на путь спасения наставил еси. Моли Господа Сил, да озарит и наш путь в Царствие Небесное.

Зосимо преславный, ангелов удивление, в подвиже преподобному Василиску подражавый, и ты, праведный Петре, послушанием Богу угодивый и молитвы Иисусовы искусный делатель явивыйся! Помозите нам подвигом добрым подвизатися и молитесь о нас ко Господу, во еже избавитися от тьмы греховныя.

Болезнями и страданиями вашими, подвижницы славнии, Бога прославили есте и ходатаи вернии о нас явились есте. Сего ради с любовию к вам вопием: молитесь ко Господу о чтущих святую память вашу.

Богородичен: Пресвятая Дево, Мати Господа нашего, спаси и сохрани нас от дел скверных и темных, да светом благодати Божия озаримся и улучим спасение.

Кондак святых, глас 3:

Днесь святии земли нашея/ с нами предстоят в Церкви и невидимо за ны молятся Богу,/ да избавит нас от враг видимых и невидимых,/ от недуга и глада, и от всякаго зла/ и спасет души наша.

Икос:

Восприимше иго благое Христово на рамена своя, святии новомученицы и праведницы, востекосте к Небесному Иерусалиму, сего ради молитесь Христа о нас, вопиющих сице:

Радуйтесь, неусыпнии наши молитвенницы;

радуйтесь, пречуднии ходатаи о нас ко Господу.

Радуйтесь, яко труды вашими вера Христова насаждается;

радуйтесь, яко кровьюми вашими Церковь утверждается.

Радуйтесь, яко со ангелы Святей Троице предстоите;

радуйтесь, яко с ними Трисвятую песнь Ей воспеваете.

Радуйтесь, яко Господь молитвами вашими спасает души наша.

Седален святых, глас 2:

Моление теплое ко Господу о нас принесите,/ святии земли нашея,/ яже кровьюми и подвиги вашими освящена бысть,/ во еже умирить мир и спасти души наша.

Слава, и ныне, Богородичен:

Моление теплое и Стена необоримая,/ милости Источнице, миру Прибежище,/ прилежно вопием Ти:/ Богородице, Владычице, предвари,/ и от бед избави нас,/ Едина вскоре Предстательствующая.

Песнь 4

Ирмос: Ты моя крепость, Господи,/ Ты моя и сила,/ Ты мой Бог, Ты мое радование,/ не оставль недра Отца/ и нашу нищету посетив./ Тем с пророком Аввакумом зову Ти:/ силе Твоей слава, Человеколюбче.

Священномучениче Владимире! Ты, словом проповеди безбожнныя обличив и за Христа страдания претерпев, во узилище Мариинстем почил еси и на Введение Владычицы во Обители Небесныя вшел еси. Темже усердно к тебе взываем: молитвами твоими сподоби и нас Царствия Небеснаго достигнути.

Учителю доблий, священномучениче Петре, тьму века сего мужественне изобличивый, и Неофите преславный, учителю добрый, сомолитвенниче Патриарха Тихона, и ты, Михаиле, наставниче ревностный, Словом Божиим народы просветивый! Молитесь ко Господу, да Светом Христовым озаримся и покаянию научимся.

Благодетеля неусыпнаго и помощника нищим и сирым, священномученика Льва прославим, братство Невское во граде Петрове

устроившаго и мученичества венец со иереем Григорием приемшаго. Молитесь ко Господу, угодницы Христовы, спаситися душам нашим.

Богородичен: Дево Пречистая, Владычице Богородице, со святыми земли наша молитвы принеси Сыну Твоему, длани пречистыя на Кресте распростершему, во еже собрати вся во едино, да братство во Христе пребывает.

Песнь 5

Ирмос: *Вскую мя отрунул еси/ от лица Твоего, Свете Незаходимый,/ и покрыла мя есть чуждая тьма, окаяннаго,/ но обрати мя и к свету заповедей Твоих/ пути моя направи, молюся.*

Блюстителю верный, святителю отче Амфилохие, раскола искоренителю и жизни церковныя мудрый устройтелю! Ты, в темницу за Христа многожды ввержен быв, веру Православную даже до крове исповедал еси. Молися о нас, да и мы в Православии утвердимся.

Священномучениче Павлине, града Мариинскаго похвало, с соузники твоими: святителем Аркадием, пресвитером Анатолием, Никандром, пастырем добрым, и Киприаном верным! Вы велия скорби доблестне притерпесте, обаче смерти за Христа на убоястесь. Молите Господа, пятерице святая, и нам верными Христу быти и душам нашим спаситися.

Седмерицу мученик, земли наша упование, в пениих прославим и ублажим: святителя Серафима, свидетеля вернаго веры Православныя, преподобномучеников Германа и Мину чудотворца со священномучеником Александром и пресвитеров Владимира, Василия и Александра, чашу страданий до конца испивших. Молитесь ко Господу, новомученицы славнии, даровати земли нашей мир и велию милость.

Богородичен: Деву Чистую призовем, Владычицу Пресвятую, да поможет нам молитве теплей научиться и в любви Божией пребыти.

Песнь 6

Ирмос: *Молитву пролию ко Господу/ и Тому возведу печали моя,/ яко зол душа моя исполнися/ и живот мой аду приблизися,/ и молюся, яко Иона:/ от тли, Боже, возведи мя.*

Священномученика Константина, раскола обличителя дерзновеннаго, восхвалим и подвиги священномученика Леонида, пастыря добраго словесных овец Христовых, во узилище Мариинстем преставльшагося, воспоим. Молитесь, святии, ко Господу, да сохраним веру Православную до скончания нашего.

Скорбьми тяжкими венцы мученическая улуцисте, священномучениче Иоанне и мучениче Михаиле! Вы бо, вкупе службу Богу совершавше, вкупе и страдания за Христа претерпесте. Молитесь ко Господу, во еже сподобитися и нам Небесныя славы.

Завистию диавола, священномученицы Александре и Константине, на совете нечестивом осудистесь и во узилище нуждею сослани бысте, идеже, болезни, глад и мраз претерпевше, упокоение во Христе обрели есте. Молитесь ко Господу, победоносцы славнии, и нам помощь Христовую наветы враг видимых и невидимых победити.

Богородичен: Стена неборимая и покров всемогущий новомучеником явилася еси, Пресвятая Дево, темже Тя величаем.

Кондак и икос воскресны:

Песнь 7

Ирмос: От Иудеи дошедше, отроцы/ в Вавилоне иногда/ верую Тройческою пламень пещный попраша, поюще:/ отцев Боже, благословен еси.

Невесты Христовы, преподобномученицы Марие и Наталие! Вы, во обители Девичей вкупе подвизавшися, и во страданиях ко Христу, Небесному Жениху, вкупе востекли есте. Егоже усердно молитесь спастися душам нашим.

Другини славныя, преподобномученицы Марие и Евдокие, обители Страстных насельницы! Вы, усердне подвизавшися, добродетельми многими житие свое украсили есте и, смерть от безбожник невинно приемши, к Победителю смерти предстали есте, вопиюща: никтоже разлучит ны от любви Божия.

Жертву живую и всеожжение Творцу себе самих приносяще, новомученицы славнии, воспевали есте: могущии, покаряйтесь, яко с нами Бог отцев земли наша.

Богородичен: Пречистая Дево, Предстательнице наша, молим Тя: преложи печаль нашу на радость и належашая скорби избави.

Песнь 8

Ирмос: Седмерицею пещь/ халдейский мучитель/ Богочестивым неистовно разжже,/ силою же лучшею спасены, сия видево,/ Творцу и Избавителю вопияше:/ отроцы, благословите,/ священницы, воспойте,/ людие, превозносите во вся веки.

Богу истово послужил еси, священномучениче Леониде, предстоя у престола сорок и два лета, и пострадал еси за Христа, непрестанно зовый: благословите, вся дела Господня, Господа.

Земля Сибирская прият тело твое, проповедниче славный, священномучениче Василие, душу же твою святую Господь, Егоже непрестанно прославлял еси, зовый: благословите, вся дела Господня, Господа.

Преподобномучениче Филарете! Ты, измлада Христа всем сердцем возлюбив, Пречистой Его Матери усердне молился еси и с образом Ея, Споручница грешных именуемым, селения верных обходил еси, подвизая их взывати: благословите, вся дела Господня, Господа.

Богородичен: О, Всепетая Мати, Владычице Богородице, Споручнице грешных, молися купно со всеми святыми земли нашея, избавитися нам от бед и скорбей и избегнути мучения вечнаго.

Песнь 9

Ирмос: Устрашися всяк слух/ неизреченна Божия снизхождения,/ яко Вышний волею сниде даже и до плоти,/ от девического чрева быв Человек./ Темже Пречистую Богородицу, вернии, величаем.

Страстотерпче Борисе терпеливодушне! Егда безбожницы прегордии на тя ополчишася, ты, всю надежду на помощь Божию возлагая, не усумнился еси и пострадал еси даже до крове. Ныне же молитвенно взываеши: молитесь ко Господу и послет вам благословение Свое.

Отче священномучениче Мироне! Ты во младенчестве веру Православную обрет и благодать Господню во граде Лаврстем стяжав, клевету и жестокую смерть от безбожников в земли нашей смиренно приял еси. Ныне же, Престолу Божию предстоя, Христа прославляеши во веки.

О, ангели земнии и человецы небеснии! Не забудьте земное Отечество ваше и место, идеже страдания за Христа прияли есте. Молите Господа, да сподобит нас, сродников ваших, море житейское безпреткновенно прейти, Царствие Небесное улучити и купно с вами славословити Пречестное и Великолепое Имя, Отца и Сына и Святаго Духа.

Богородичен: Дево Чистая, Мати Господа нашего, со всеми святыми земли нашея, моли Бога о нас.

Ексапостиларий воскресен.

Слава, святых, глас 1:

Да знаменается на нас Свет Лица Твоего, Господи, Егоже святии Твои явиша нам, во еже просветити души наша.

И ныне, Богородичен воскресный.

На хвалитех стихиры воскресны 4, и святых 4, глас 8:

Восхвалим Бога, дивнаго во святых Своих,/ озарившаго землю Кемеровскую подвиги святых древних и новых,/ имиже тьма греховная разгнася/ и радость небесная всем даровася.

Возславим Господа, призревшаго на люди Своя/ и страданьми святых Своих всех нас благословившаго,/ с нимиже Тому возопиим:/ Всещедрый Боже наш, слава Тебе.

Возвестим о Господе радость велию,/ обрели бо есмы покровителей и защитников наших,/ ихже молитвами сохрани, Господи,/ Отечество наше земное/ и утверди в Православии люди Своя.

Слава, стихира евангельская.

И ныне, глас 2: Препоблагословенна еси, Богородице Дево:

На Литургии

Прокимен, Апостол, Евангелие и причастен воскресны гласа. И святых прокимен, глас 4: Дивен Бог во святых Своих, Бог Израилев. Апостол к Римляном, зачало 99. Аллилуиа, глас 4: Воззваша праведнии, и Господь услыша их. Стих: Многи скорби праведным, и от всех их избавит я Господь. Евангелие от Луки, зачало 106. Причастен: Радуйтесь, праведнии, о Господе, правым подобает похвала.

Молитва

Призри, Господи, с высоты святяя Твоея на предстоящая люди и прими благодарение наше о Твоих великих благодеяниях, яже сотворил еси со отцы нашими! Услыши нас, прославляющих Имя Твое святое, яко благоволил еси прославити во святых избранныя Твоя, праведники древния и мученики новыя, ихже земля наша произрастила есть, яко благое прозябение и плод красный.

О, преподобнии и праведнии земли Кемеровския! Вы Господа Бога всем сердцем своим возлюбисте и всецело Ему угодисте! О, святии новомученицы земли нашея! Вы во дни гонения безбожнаго от сокровищниц душ ваших спасительное исповедание Православныя веры изнесли есте и людям верным наставницы добрии явились есте, души своя за Христа и други полагающе. Ныне убо к вам с любовию прибегаем и молимся: будете небеснии заступницы земному Отечеству вашему, наставляюще нас творити волю Господню, во еже преспевати и нам в вере, благочестии и любви христианстей, прославляюще едином сердцем и единими усты Святую, Единосущную, Животворящую и Нераздельную Троицу, Отца и Сына и Святаго Духа, ныне и присно и во веки веков. Аминь.

Список Собора Кемеровских святых

1. Амфилохий (Скворцов), сщмч.: С.18
2. Анатолий Левицкий, сщмч.: Ок.21
3. Александр Андреев, сщмч.: Ок.21
4. Александр Лебедев, сщмч.: Ок.22
5. Александр Лихарев, сщмч.: Мр. 4
6. Аркадий (Ершов), сщмч.: Ок. 21
7. Борис Успенский, мч.: Д. 2
8. Василий Богоявленский, сщмч.: Ок. 22
9. Василий Мирожин, сщмч.: Д.20
- 10.Василиск Сибирский, прп.: Д.29
- 11.Владимир Рясенский, сщмч.: Н. 22
- 12.Владимир Соболев, сщмч.: Ок. 22
- 13.Герман (Полянский), прмч.: Ок. 22
- 14.Григорий Аверин, сщмч.: С.7
- 15.Евдокия Павлова, прмц.: Ап.20
- 16.Зосима (Верховский), прп.: Д.24
- 17.Иоанн Колесников, мч.: Ап.17
- 18.Иоанн Орлов, сщмч.: Мр.7
- 19.Киприан Анников, мч.: Ок.21
- 20.Константин Соколов, сщмч.: Мр.12
- 21.Константин Пятикрестовский, сщмч.: Мр.6
- 22.Лев (Егоров), прмч.: С.7
- 23.Леонид Викторов, сщмч.: Д.28
- 24.Леонид Муравьев, сщмч.: Ок. 29
- 25.Мина (Шелаев), прмч.: Ок.22
- 26.Мария Носова, прмц.: Ап.27
- 27.Мария (Цейтлин), прмц.: Д.2
- 28.Мирон Ржепик,сщмч.: Ав.31
- 29.Михаил Березин, сщмч.: Д.31
- 30.Михаил Марков, сщмч.: Ин.3
- 31.Михаил Строев, мч.: Мр.30
- 32.Наталья Бакланова, прмц.: Мр.31
- 33.Неофит (Осипов), прмч.: Ок.21
- 34.Никандр Чернелевский, сщмч.: Ок.21
- 35.Павел Смирнов, сщмч.: Ф.16
- 36.Павлин (Крошечкин), сщмч.: Ок. 21

- 37.Петр Попов, сщмч.: М.12
- 38.Петр Гомский, прав.: Мр.4
- 39.Серафим (Самойлович), сщмч.: Ок.22
- 40.Филарет (Пряхин), прмч.: Ф.22